

Här Fernand Etgen
President vun der Deputéierte Chamber
19, um Krautmaart
L-1728 Lëtzebuerg

Lëtzebuerg, den 12. September 2022

Här President,

esou wéi d'Chamberreglement et virgesäit, bieden echlech, dës parlamentaresch Fro un den Här Schoulminister weiderzeleeden.

Laut Ministère komme vum Schouljoer 2023/24 gréisser Ännerungen op d'Librairien duer, déi mam Ministère konventionéiert si fir de Verkaf vun de gratis Schoulbicher fir d'Lycéeën. D'Fédération luxembourgeoise des Libraires huet un déi betreffend Librairien ee Formulaire geschéckt, fir chiffréiert Informatiounen iwwer de Verkaf vu Schoulbicher am Kader vum Programm "mybooks.lu" ze kréien. Bei dësem Sondage huet op d'mannst eng vun de concernéierte Librairien op d'Fro *"Quelle serait la conséquence pour votre librairie si le MEN/SCRIPT ne faisait plus un appel à partenariat dans le cadre du GMS / mybook.lu?"* d'Case *"Impact majeur: risque de fermeture de la librairie"* cochéiert.

Am Kontext vun der Diffusioun vun de Schoulbicher fir d'Rentrée scolaire 2022/23 gëtt et eng Ännerung, wat d'Schoulbuch „Envol“, Tome 1, 2 an 3 ugeet, dat bis elo ëmmer vum Lehrmittelverlag Zürich iwwert eng Lëtzebuerger Distributiounslibrairie ausgeliewert gouf. De 6. Juli 2022 kruten déi mam MEN konventionéiert Librairien eng E-Mail vum SCRIPT, an där annoncéiert gouf, dass de SCRIPT vun der Rentrée scolaire 2022/23 un d'Ausliwwerung un d'Librairien iwwerhuele géif. De Verkaufspräis wéi och d'Remise libraire géifen onverännert bleiwen, awer d'Retoure vun de Schoulbicher géifen net méi akzeptéiert ginn. Déi betreffend Librairien hate vun Ufank u beim Lehrmittelverlag Zürich en Droit de retour vun 20%. Souguer bei deene Schoulbicher, déi vum Ministère selwer editéiert ginn a vum Centre des technologies de l'information de l'État (CTIE) ausgeliewert ginn, hate si en Droit de retour vu 15%. Doriwwer eraus konnte si déi Bicher, déi net méi um Programm stinn, zréckginn.


An deem Zesammenhank hunn ech folgend Froen un den Här Minister:

- 1) Bleift de System „MyBooks“ **exklusiv** fir déi Librairien, déi zu Lëtzebuerg etabléiert sinn an déi mam Ministère konventionéiert sinn, zu deene selwechte Konditiounen bestoen?
- 2) Wéi vill Prozent vun de Schoulbicher wäerten an Zukunft just nach als E-Book um Programm stoen?
- 3) Wäert d'Distributioun vun deenen E-Books zukünfteg iwwer d'Librairien ofgewéckelt ginn?
- 4) Op wéi enger legaler Basis kann de SCRIPT an d'Privatwirtschaft agräifen, andeems dës Service decidéiert, d'Distributioun vun de Schoulbicher an domat d'Konditiounen fir d'Librairien, déi scho laang bestinn, zu deenen hirem Nodeel ze änneren? Missten

net déi selwecht Konditiounen erhale bleiwen, wann de SCRIPT als Successeur d'Distributioun iwwerhëlt?

- 5) Missten net wéinstens déi selwecht Konditiounen fir den Droit de retour bestoe bleiwe wéi beim CTIE, also op d'mannst 15%?

Mat déiwem Respekt,

A handwritten signature in black ink, appearing to be 'Fred Keup', written in a cursive style.

Fred Keup,
Deputéierten



Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 6812 vum honorabelen Deputéierte Fred Keup

Ad 1)

Am Kader vum Gratuitéitsprogramm fir den Enseignement secondaire schafft den Educatiounsministère weiderhi mat all deene Lëtzebuerger Librairien zesummen, déi all Schouljoer op en Neits d'Konditiounen vun der entsprecherender Soumissioun erfëllen. D'Applikatioun www.mybooks.lu wäert och déi nächst Joren als zentral Plattform vum Gratisschoulbuchprogramm déngen.

Ad 2)

Wéi héich den Taux vun den digitale Schoulbicher am Secondaire an Zukunft wäert leien, ass net virauszegesinn. Den Undeel vun den E-Book-Versiounen un alle Schoulbicher hänkt vun der editorialen Offer a vu pädagogesch-didakteschen Decisiounen of, déi an de Programmkommissiounen getraff ginn.

Ad 3)

D'Distributioun vun den obligatoreschen Schoulbicher am E-Book-Format wäert och an Zukunft net iwwert d'Librairien ofgewéckelt ginn.

Ad 4)

Als Distributeur huet de SCRIPT keng legal Obligatioun, en Droit de retour vun 20 % ze accordéieren.

Ad 5)

Duerch den Ëmstand, datt de SCRIPT am Kader vun der Distributioun vum Schoulbuchtitel "Envol" keen Droit de retour zouléisst, entsteet der eenzelner Librairie kee finanziellen Nodeel. Et steet all Librairie fräi, méi dacks méi kleng Quantitéiten ze bestellen. Doduerch gëtt en Droit de retour de facto onnéideg.

Lëtzebuerg, de 6. Oktober 2022

De Minister fir Educatioun,
Kanner a Jugend

(s.) Claude MEISCH